

- प्रदेश रा पशुपालकां ने काल ऊं मोबाइल इकाइयां रे जरिये घरां मांय ई ढांढा रा ईलाज रो सुबीतो मिलेला।
- भारतीय वायु सेना रा स्थापना दिवस रे मौके आज खास जळसो चेन्नई रा तांबरम एयरफोर्स टेशन माथे राख्थी ज्यो।
- पी एम सूर्य घर मुफ्त बिजली योजना रा तैत श्रीगंगानगर जिला मांय हाल ताई 4 हजार 758 किलोवाट बूता रा सोलर पैनल लगायी ज्या।
- 2 अक्टूबर ऊं सरू व्ह्या धरती आबा जनजातीय ग्राम उत्कर्ष अभियान रा तैत बारां जिला मांय 277 गांवां रा जनजातीय लोगां ने फायदो मिलेला।

000

राज्य मांय पशुपालन विभाग री मोबाइल इकाइयां सारू जयपुर मांय कॉल सेंटर काल काम करणो सरू करेला। आं रा उद्घाटन रे मौके पशुपालन अर गौपालन मंत्री जोराराम कुमावत अर राज्य मंत्री जवाहर सिंह बेढम मौजूद रेहवेला। पशुपालन विभाग रा शासन सचिव डॉ समित शर्मा बतायो के केन्द्र सरकार री 'मैट्रिक्स-डटन' योजना रा तैत प्रदेश मांय 536 मोबाइल वेटेनरी यूनिट बणायी ज्यी है, ज्यां रे मार्फत पशुपालकां ने वां रा घरां मांय ई ढांढा रा ईलाज रो सुबीतो मुहैया करायो जावेला। राज्य मांय हर 01 लाख जिनावरां परां एक मोबाइल वेटेनरी यूनिट काम करेला। कॉल सेंटर रा हेल्प लाईन नंबर 1962 माथे फोन कर र पशुपालक आं सेवावां रो फायदो ले सके है।

000

भारतीय वायु सेना रो आज स्थापना दिवस मनायी ज्यो। ई मौके खास कार्यक्रम चेन्नई रा तांबरम एयरफोर्स टेशन परां राख्थी ज्यो। थल सेनाध्यक्ष जनरल अनिल चौहान झण्डो फहरायो। वायु सेना अध्यक्ष एयर चीफ मार्शल ए पी सिंह परेड रो निरीक्षण कीनो अर बेहतर काम करण वाळी वायु सेना इकाइयां ने मानपाना अर ईनाम दे र नवाजी ज्या। एयर चीफ मार्शल ए पी सिंह कह्यो के केई मोर्चा माथे वायु सेना अद्भुत बूता रो दरसाव कीनो है। वे कह्यो के वायु सेना रो तरंग शक्ति युद्धाभ्यास 61 साल रा आंतरा पाछे ओजू भारत मांय करी ज्यो जिण मांय तीस ऊं बत्ता देश सिरकत कीनी। वे कह्यो के वायु सेना रा अहलकार अर जवान भांत भांत री कुदरती आपदावां रा हालात मांय बढ़-चढ़ र राहत अर बचाव रा कामा मांय सिरकत कीनी।

00000

बेहतर लड़ाकू जहाज सुखोई-30 एमकेआई ने देशी तकनीक ऊं और बेहतर बणायो जा रह्यो है, जिण मांय रक्षा अनुसंधान अर विकास संगठन-डीआरडीओ कानी ऊं विकसित करी ज्यो उत्तम रडार लगायो जा रह्यो है, जो सुखोई-30 ने चौथी पीढ़ी रा लड़ाकू जहाज ने 5वीं पीढ़ी रा लड़ाकू जहाज रो बूतो देवेला। लारला महीना जोधपुर मांय व्ह्या डिफेंस एविएशन एक्सपो मांय डीआरडीओ उत्तम रडार रो दरसाव कीनो हो।

देश मांय मौजूदा दौर मांय 259 सुखोई-30 लड़ाकू जहाज है, जो चौथी पीढ़ी रा है। जोधपुर एयरबेस माथे वायुसेना री दो स्कवाड्रन मांय करीब 36 सुखोई-30 विमान तैनात है।

00000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है। इण मांय आज पेश है उपभोक्ता मामलात, खाद्य अर सार्वजनिक वितरण मंत्रालय री उपलब्धियां री जाणकारी –

.....

00000

केन्द्र सरकार री पीएम सूर्य घर मुफ्त बिजली योजना ऊं श्रीगंगानगर जिला मांय ई जनता ने फायदो मिल रह्यो है। म्हाणा खबरनवीस बतायो के जिला मांय हाल ताई 829 जणा ने कनेक्शन दे दिया ज्या है अर 4 हजार 758 किलोवाट बूता रा सोलर पैनल लगा दिया ज्या है।

.....

बारां जिला मांय केन्द्र री महत्वाकांक्षी योजना धरती आबा जनजातीय ग्राम उत्कर्ष अभियान रा तैत काम करण बाबत आज खास मीटिंग राख्यी ज्यी। प्रधानमंत्री नरेन्द्र मोदी गांधी जयंती रे मौके 2 अक्टूबर ने धरती आबा जनजातीय ग्राम उत्कर्ष अभियान सुरू कीनो हो। जिला कलेक्टर बतायो के ई रा तैत जिला रा 8 ब्लॉक रा 277 गांवां मांय 17 मंत्रालयां री भेळी कोशिशें ऊं 25 योजनावां माथे काम कर्या जावेला। आं मांय शिक्षा, स्वास्थ्य, बुनियादी ढांचा अर काम-धंधां ऊं जड्या कामां माथे खास ध्यान दियो जावेला।

0000

जनजाति मंत्रालय रा संस्थान ट्राइफेड री ओर ऊं जनजातीय संस्कृति रो दरसाव करण रा जतन रा तैत जयपुर मांय आज "आदि बाजार" सुरू करीज्यो। ट्राइफेड रा क्षेत्रीय प्रबंधक संदीप शर्मा बतायो के 15 अक्टूबर ताई चालण वाळा आदि उत्सव मांय देशभर रा 50 ऊं बत्ता आदिवासी कारीगरां रा सामान बिक्री सारू लायी ज्या है। वे बतायो के "आदि बाजार" रो मकसद जनजातीय कलाकारां ने मंच मुहैया करा र वां री सामाजिक अर माली बरकत मांय मदद करणो है।

.....

00000

टोंक जिला मांय अविकानगर रा केन्द्रीय भेड़ अर ऊन अनुसंधान संस्थान मालपुरा मांय राष्ट्रीय पशुधन मिशन योजना रा बारा मांय कार्यशाला राख्यी ज्यी। केन्द्रीय पशुपालन अर डेयरी राज्य मंत्री एस.पी. बघेल कार्यशाला मांय खास पावणा रा तौर ऊं सिरकत कीनी। कार्यशाला मांय भेड़, बकरी अर खरगोश पाळबा रा बारा मांय विचार करी ज्यो। केन्द्रीय मंत्री ई संस्था रा कामकाज रो जायजो ई लीनो। कार्यशाला मांय राज्य रा पशुपालन अर गोपालन मंत्री जोराराम कुमावत अर जलदाय मंत्री कन्हैया लाल चौधरी ई मौजूद रह्या।

00000

सुरक्षा सखी संवाद पखवाड़ा रा तैत आज सवाईमाधोपुर जिला मांय एस.पी. ममता गुप्ता री सदारत मांय सुरक्षा सखी संवाद-कार्यशाला राख्यी ज्यी। एसपी बतायो के महिलावां अर टाबरियां मांय खुद री हिफाजत रा बारा मांय जाग जगावण रा मकसद ऊं 5 ऊं 20 अक्टूबर ताई सुरक्षा सखी पखवाड़ो मनायो जा रह्यो है। वे बतायो के ई रा तैत हर पुलिस थाना ऊं तीन सुरक्षा सखियां ने चुणी ज्यी है। एस. पी. बतायो के पखवाड़ा रा तैत चलाया जा रह्या जागरूकता अभियान पाछे हर जिला मांय चौखो काम करण वाळी पांच-पांच सुरक्षा सखियां रो रेंज लेवल माथे मान कर्यो जावेला।

000

टोबैको फ्री यूथ कैंपेन 2.0 रा तैत आज पाली मांय मीडिया कार्यशाला राख्यी ज्यी। ई मौके सी. एम.एच.ओ. डॉ. विकास मारवाल बतायो के नवाचार रा तहत कॉफी मग माथे जिंदगी चुनो तंबाकू नहीं टैगलाइन अर लोगो छापी ज्या है, जो दफ्तर मांय जनता ने तंबाकू ऊं बणी चीजां काम लेवणी छोडबा सारू सीख देवेला।

ई रे अलावा टोबैको फ्री यूथ कैंपेन 2.0 रा तैत नुक्कड़ नाटक, भाषण होड़, रैली अर तंबाकू से मुक्ति शपथ सरीखा कार्यक्रम राख्या जावेला। ई सागे ई तंबाकू मुक्त ग्राम पंचायत अर तंबाकू नियंत्रण एम्बेसडर ई नामित कर्या जावेला। अलवर मांय ई ई अभियान रा बारा मांय आज मुख्य चिकित्सा अर स्वास्थ्य अधिकारी डॉ. योगेन्द्र कुमार शर्मा खबरनवीसां ने विगतवार जाणकारी दीनी।

00000

प्रदेश रा न्यारा-न्यारा जिला मांय विज्ञान मेळा लगाया जा रह्या है।

पाली मांय लडकियां री सरकारी स्कूल मांय आज सीनियर वर्ग मांय मॉडल बणावण री होड़ राख्यी ज्यी। होड़ मांय भोजन, स्वास्थ्य अर सफाई, परिवहन अर संचार, कुदरती खेती, आपदा

प्रबंधन, कचरा प्रबंधन अर संसाधन प्रबंधन ऊं जुड़्या मॉडल रो दरसाव करी ज्यो। जूनियर वर्ग मांय विज्ञान रा बारा मांय प्रश्नोत्तरी री होड़ राख्यी ज्यी अर मोटा अनाज रा बारा मांय सेमिनार व्ही। बाड़मेर ज़िला रा गुढ़ामलानी मांय चाल रह्या विज्ञान मेळा मांय बाल वैज्ञानिक चंद्रयान-थ्री अर कुदरती खेती सरीखा मुद्दा माथे मॉडल बणाया। विज्ञान मेळा मांय दृष्टि बाधित दिव्यांग विद्यार्थी न्यारी-न्यारी अड़चनां री सेंसर री मदद ऊं पैली जाणकारी हासिल करण अर चंद्रयान-3 छोडबा ऊं जुड़्यो मॉडल ई बतायो। सवाईमाधोपुर री सरकारी सीनियर सैकेण्डरी स्कूल शहर मांय चाल रह्या ज़िला स्तर रा विज्ञान मेळा मांय ई शरीर स्वास्थ्य विज्ञान, पर्यावरण, खेती-बाड़ी अर अंतरिक्ष समेत न्यारा-न्यारा मुद्दां माथे आधारित मॉडल रो दरसावा करी ज्यो, जिण मांय मोटी तादाद मांय विद्यार्थी सिरकत कीनी। तीन दिन रा ऐ मेळा काल पूरा व्हेला।

00000

हनुमानगढ़ जिला रा नोहर मांय आज महाराजा गंगासिंह विश्वविद्यालय बीकानेर री ओर ऊं राख्यी जा रही लड़कां री अंतर महाविद्यालय फुटबॉल होड़ सरू व्ही। तीन दिन री ई होड़ मांय बीकानेर संभाग रा 12 कॉलेजां री टीमां सिरकत कर रही है। होड़ रा उद्घाटन मैच मांय महाराजा गंगासिंह विश्वविद्यालय, बीकानेर राजकीय महाविद्यालय, सूरतगढ़ ने 2-0 ऊं शिकस्त दीनी।

डॉ. भीमराव अम्बेडकर राजकीय महाविद्यालय, श्रीगंगानगर अर राजकीय डूंगर महाविद्यालय, बीकानेर रे बीचे खेली ज्यो मुकाबलो राजकीय डूंगर महाविद्यालय, बीकानेर 1-0 ऊं जीत्यो। दूजी कानी केकड़ी मांय चाल रही राज्य स्तर री 68वीं सैकेण्डरी अर सीनियर सैकेण्डरी स्कूलां री लड़कियां री सॉफ्टबॉल होड़ रा तैत आज 17 अर 19 साल उम्र वर्ग रा क्वार्टर फाइनल मुकाबला व्ह्या। 17 साल उम्र वर्ग मांय श्रीगंगानगर, बाड़मेर, शाहपुरा, अर हनुमानगढ़ री टीमां सेमीफाइनल मांय पूग ग्यी। 19 साल उम्र वर्ग मांय ब्यावर, फलौदी अर नागौर री टीमां आगला दौर मांय पूग ग्यी। काल सेमीफाइनल अर फाइनल मुकाबला खेल्या जावेला।

00000